

卷四
第廿六

孫為靜齋

國學萃編

第四十七期

朱點衣署



國學萃編

序

朱點衣題



捐助社費

芳名

以收到先後為序助十元者照章由二十七期起送閱三年助三十元以上者由第一期起永遠送閱

楊白山先生助洋拾元

沈鈞平先生助洋拾元

著泃吟社第七十五課題目

寢言子值課

詩題 收鼠 仿白香山樂府體例

詩鐘題 病 黠鼠賦 分詠體

限四月初十日截止卷交北京宣武門外香爐營頭條胡同國學萃編社

童君補蘿代收不誤

第七十六課題目預告 詩題 望煤山弔明莊烈帝 七古一首不限韻

詩鐘題 司馬遷 敝屣 分詠體 此為性園值課所擬恐外省諸君

得題較遲特為預告以後恕不展期交卷同上 著泃吟社謹啓

詩鐘求 教

楫柚生加課

題目 禁烟 謂寒食也禁烟 謂鴉片也 分詠體

限四月初十日截止卷交本社代收務祈諸君廣錫佳章是所至禱

吉林紀事詩題辭展期廣告 沈鈞平大令前曾以所著吉林紀事詩徵求題辭迄今已逾期限而收卷寥寥特再展期一月以四月初十日爲止務祈同社諸君暨海內吟家不吝珠玉以光卷帙紀事詩之內容已載入第四十五期萃編廣告欄內茲不贅述卷寄吉林省城督練公所兵備處文案室沈鈞平君自收或交本社代寄亦可

童補蘿代啓

夕治事已將兩年其性情則嗜碑版若性命其家雖清苦然見可喜者則廢眠食不得不休以故書法出入顏平原歐陽率更其行義則與人無少長賢不肖皆充然以和其學業則日手一編不旁詢而治法學尤詳審令竟其學固公平廉介一佳司法官也然竟死且死又甚慘年僅三十有二死時衰親在堂遺孤三皆齟齬天下事宜無如君死之痛者余之爲此不足盡君萬一然自問無溢分語倘足備當代能文君子之采擇且付其家俟其遺孤長大時讀之令知乃翁之苦心也

沙彥楷曰宋田晝之送鄒浩謫嶺南也曰浩居京師五日不汗死矣豈獨嶺海之外能死人哉然則人之生固無時無地不可以死獨以君死之速且慘而悁悁然悲之淺見者甚且以君遠客苦學爲戒寤老死不肯出牖下尺寸烏乎其儻矣痛乎志田先生之言今中國之愛新教育者至可寶貴君之玉拆當爲國家惜推斯意也則吾輩益當兼程孟晉得尺則尺得寸則寸毋

令且暮死與草木同腐而國家不能收涓滴之報也若第頹視而緝行履焉日慮長夜之將至即幸得保壽考亦一行尸走肉耳况並此而不能醉而生夢而死生存華屋零落山邱於已於國會無一補不且爲吾伊臣地下所竊笑乎此則余所欲爲天下正告者矣

清輔廷中丞謁岱記叙

海豐 吳重憲 仲怡

昔於丙寅秋作泰山之游濟沅水臨華不歷靈巖五峯以縱轡於岱吹肩輿挽革蟹行一磬掉間輒更新賞其瀑激鐘鏞泉語琴筑則天神巖御帳坪之瀏亮也其銳石劍鋸鐵壁斧削則對松山歇馬崖之前劣也其雲聚濤青苔垂鱗碧則五大夫松之離奇也其百級怵心二分露趾則十八盤之險峻也其上界星辰下方鐘磬則南天門之跌蕩也他若日出之詭奇石陽之幽險展齒可到者無不徧焉每欲追述記之目瞶舌撝輒握管而不能下十年來奔走燕齊鎔塵化素簿書鞅掌已無復薤薜繁心丙子秋與少輔仁仲千從

東陵歸途同作田盤之游歷天成萬松之勝訪盤谷遺址登雲罩極巖出東竺而歸崖目爲之一豁相與商略記之少輔因出輔廷老伯泰山游記二篇見示並屬綴序言授而讀之覺昔之目瞶舌撝握管不能下者一一皆探喉出之即坐我於倚雲館中其目所見神所疑手口所能繪者亦不過如是而已夫公以慈惠福我東人至今白叟黃童言之歷歷則膚寸而徧天下者其政績原與秦岱同高此奉 命餘閒猶不忘乎筆札且忠孝之義時流露於行間雖重公者不僅以文章文章因公而益重則斯記之作豈容已哉他日授梓當攜千萬本歸以示我東人當無不欷歔感念我公之遺愛而興山高水長之思也

重刊嚴州府志叙

葉赫聯 毅少輔

修志與作史異龍門叙三皇至秦漢之事爲書祇一百三十卷其後一代之書卷帙多增於遷書至宋史分爲四百九十六卷矣史才之優絀難以盡述

計修志則不然某郡某縣之志則必某郡某縣之疆域由周大勳風俗選舉金石藝文以及一切興廢沿革建造之事搜羅必廣年月必詳庶幾後世史臣之採擇論者謂明康海武功志僅三卷其簡要爲歷代志書之冠非通論也嚴陵於宋爲睦州後改遂安軍紹興年間有遂安軍志若干卷度宗嘗領節度使即位後升爲府於是教授鄭瑤學錄方仁榮譔景定嚴州續卷十卷附刊於紹興舊志之後今紹興志軼不傳而景定志猶有存者其戶口門載寧宗楊皇后爲嚴州人足以訂宋史之譌固地志之善本也自是以後嚴州志多不傳其傳者祇萬曆志二十四卷而已卷首題名不著譔人或曰主修或曰同修或曰纂修或曰續修或曰彙集體裁皆雜其不及景定志遠矣 國朝康熙二十二年郡守任君重輯府志至乾隆三十一年吳守士進始刊之其書差勝於萬曆志今嚴州守桐城吳君世榮重刻是書問序於予予奉 命巡是邦二年於茲矣搜輯文獻因分內事而吳君獨先予爲

之則其勤於民事也可知雖然予聞嚴陵山水甲天下自嚴先生後山林隱逸之士多有崇尚氣節維持世風者若唐之施肩吾方干徐凝周樸宋之方夔何夢桂其著也謝臬羽遭亂後亦嘗流寓其地至今讀西臺慟哭記猶懷然有生氣方今新遭亂離嚴州爲新安下流被禍尤烈豈無一二隱君子矢志不屈如臬羽其人者吳君擬援景定志例於舊志附刻數卷幸博訪而備登之無使潛德幽光湮沒於 聖明之世此則予之所厚望也

廬嶽集序

中江王乃徵

夢湘攝守南康逾年既集唐太白詩刊成一卷復成廬嶽集詩三卷游山之豪得詩之富與詩境之創闢而意益奇語益工者前之人未有也古詩人之爲廬山重者莫如陶徵士往來廬山而所傳無遊山詩非遺秩則習而忘之歟次則謝康樂有登廬峯絕頂詩僅寥寥短章耳數百年至唐之太白爲廬山謠諸篇乃一發茲山靈秀凡使人人心目咸以之匹五嶽當稱境者雖自

有太白始又數百年至東坡坡於詩有宋之太白也遊廬山亦僅三勝兩章若不欲爭勝古人者然後之以繼太白必斷自東坡矣以四君子之托跡爲廬山重或無詩或不多有發奇啓秘僅止於是然則豈山川靈秀之不欲盡洩於人抑古人之才思容有至有不至耶夫使生古人後視古人所爲皆若不足而新知以爲異創獲以爲奇者非愚則狂然遂事事甘遜古人且擬足投跡以求其合亦必古人之所不取凡德業皆然詩其一端耳夢湘少負奇氣思銳而學博既鬱鬱無所試恒縱山水遊託詩歌以自適其爲詩也才雄氣道天骨開張於古人無所不窺而不屑摹擬其神似自抒所得觸景而發曩嘗爲西征集矣陟太行歷秦隴俯仰蒼茫之感一寄於詩既而登泰山觀日出放乎南海探羅浮之勝歷境愈奇爲詩愈進夫夢湘豈直以是自豪而求爭勝古人哉中不自秘猶山川靈秀之不可閉藏值其人而一洩而於古人之所得爲離爲合有不暇較者且執以驗之古人猶是耳則安得而爲古

人囿也今茲攝僻郡無所試如前適與名山爲緣境逼而時暇身世之感觸抑有更異疇昔者斯其遊之豪詩之富而得前人之所未有亦何疑乃微兄事夢湘久謂足知夢湘尤喜誦夢湘之詩雖於詩固未學亦時質其陋爲夢湘誘進於是集也又以香爐瀑布之遊有志未逮而夙昔讀太白東坡詩寤寐間嘗恨不一至者今展卷而千巖萬壑已不啻臥遊之遍飄飄然如置身諸峯雲氣間也夢湘使弁言遂不辭若其詩之擬古人爲奚近且視凡繼太白東坡有作足重廬山者爲奚若當決於能詩之君子乃微亦自貢所得遺以爲夢湘質耳

黔遊三編自叙

平江余 情 勤夫

今夫以勢緊繁華之地而爭先恐後人情也况當莽莽泯泯之世沈疇浮榮不務樸實尤爲特甚乃有人焉於邊徼荒隅往復託足至於再三若忘其鄙野無文者不亦異乎然而深山密箐之中荒煙蔓草之野往往有光怪陸離

積之百年以待騷人表暴君子於此所爲日與山水文字爲緣而顯晦隨命自有天在固無所容心於其閒也曩客普安越南多故名疆利藪天下趨之邇來二十有四年矣時事變遷朝廷舉行新政奔走少年英豪余以老朽重循舊遊繼鑿乎洞壑巖谷之幽所過桃源辰州黔陽輒訪仙洞龍標伏波諸古蹟而黔之府城十有二歷其治者八思州九龍峯思南中和山白鷺洲鎮遠青龍洞中元洞銅仁諸葛銅鼓皆足以發詩人之幽思歎呼闌韻幾無暇日何其不憚煩而思退也嗟乎天下之名山大川多矣吾嘗得而遊之然類當勢要繁華之衝趨之者衆則冠蓋車馬環而集之亦俗已甚矣夫人之所以出類拔萃卓然於天壤閒者大都視此志趣何如耳彼徵逐靡麗擯者富貴之徒匪獨識所不齒幾見不辱其身而喪厥命哉噫百年過客萬事浮雲吾何所求於黔沈吟山水以續吾詩或不負斯遊也

縫月軒詞叙

王倫辰

薄湯武自外周孔草野竊相詫怪朝廷聞而見惡足下檢之逼逼丹忱知復無益使還率報敬復陳言濤白

駢花閣文選卷三終

駢花閣文選卷四

番禺沈宗畸太作輯錄

擬重修桃花夫人廟碑

會稽孫慶曾 遂先

一唱湘君之曲翠籜烟凝千秋靈澤一祠丹楓江冷雖遺弓天上留長恨于
絕弦而故劍塵中幸不韜乎別室固已荐馨赤縣流馥彤篇若夫妖鴟哆舌
真成傾國之媒匹鳥驚羣莫遂汎舟之誓精衛有種碧海填難離恨亾梯青
天路絕然且擣綠芸以成塵拗紅蓮而作寸香殘絲盡芳心不灰地老天荒
恨血終雪有若桃花夫人者宜其幽靈未滅肝鬢常存者矣夫人姓分媯氏
系出虞思攸相息侯翟輝姬籙芳澤娥媼流乎蘭掖稚齒媿嬌處以椒闈方
謂察柏立榦繫在烏蘿昌蒲有花歐之螭頷金屋棠嬌已孕三危之露環臺
榴實詎萎六月之霜爾乃旛圖日月陶家開醪酒之嫌埃突烽煙空國疊坎
侯之譜男兒解甲妾在深宮死別含辛夢殘故主斛律妃之把玦玉碎何難
中山后之靡笄无折奚補七年黃鵠豈雙飛于賢雄三幼春蠶賸寸絲于獨

爾固知矢一臥之節以雪終身之怨也夫其暗鬢柳騰莫忘舊恩不吐蘭
芬偏承新寵丁香比舌同結于迴腸櫻桃爲脣未破乎淺笑濃艷泣露任攀
解語之枝光悅在面惟和齷兒之雪至于修怨有在戎首偕亾蔡社爲虛楚
宮撒涕春秋大復讎之義後世諒夫人之心焉矣今者叢祠鼓笛夕陽則漢
水流紅故國山河春樹亦暝川飲淥而落花與遺構飄零翠羽共珠題銷蝕
非所以妥靈爽昭明禋也夫點綴江山尙有小姑之廟荒唐雲雨猶存神女
之祠以彼況茲豈云無憾是用尋舊蹟拓新宮撤章華之材築貞姬之館井
鍍碧藻倒栽並蒂之蓮隔署紅香細搯皮金之字斲文梓于韓憑墓上栽爲
畫寢玳梁削女貞于黍室楹閒譜入神絃瑤瑟青溪何處酌流水以當瓊漿
天台有原齋胡麻而登玉饌從此春曉秋怨管領重泉薄命之司所願花好
月圓長爲萬古情天之主敢饒貞石兼勒芳銘銘曰
懿與夫人含靈抱淑寫貌丹葩孕質紅玉誰爲毒蠱膏煎蕙焚琵琶比怨鼻

浮毛君乍拂茵席復隊藩園非廿二夫非辭九殞疾首蔡人實維厲階不有
鷗鷺曷殲鳩媒忍臥一朝不言三年孺弱立志金泐石鐫鏡鸞悴景琴蛟鬱
氣腥霞織馥寒雨宿淚花紫辭蜀椒閩譜詩杜秋屬李猶惜春時孰與秦敷
脩詞桑下彼其喋喋克迴五馬言以完節不言姦讎一經一權異軌同流朱
寢峩峩靈旂瑟瑟芳俎在筵薦以蕢實碧磯蟻宮黃陵杜宇大地同春靈祠
芳樹花開歲歲花落年年竹殘帛裂茲文不刊

答鄔公騰書

震澤王廷鼎書

間承詩翰及序文臨風誰頌耿耿寸丹其闕然久不報者一感惠我之厚欲
得一言以答大文而志涸腸枯如小巫之神氣一德知我之深欲俟一善以
慰錦注而抗塵蒙靄如元規之形骸然日月斯邁倦念益殷寒霰欲凝墨痕
未凍略爲足下陳之僕聞之文酒者窮之緣也聰明者愁之媒也風雅者怨
之府也丰骨者禍之胎也士有此四者可不必登名利場爭顯晦機矣何則

以一己之所是敵千萬人之所非以千萬人之所長攻一己之所短猶欲仰首覲面妄博優容不亦昧德力而忘度量者乎僕以偏親垂白思謀升斗之精筮仕入越閱十六月矣終以疥駝之文鷗蟲之譽偶邀當道謬賞使得奉檄赴滬從公蜚輓猥蒙足下獎掖踰分殷殷焉若以祖鞭勗我以牙琴幸我僕味此言思滋甚矣使僕上有孔李之誼尹結之姻可以夤緣於當路下有饋贈之資鄉曲之譽可以市悅於同官則足下雖不爲僕賀而僕得長恃以無恐矣處幹鼎寶瓠之世徒以敝帚襪線冀常親媚於上游竊恐梁公之藥籠有難容而劉邕之嗜痂不數覲也自今以往僕惟效捧心顰畫入時眉薙忠恕於思之鬚抉王恂識丁之目得以隨俗浮沈長邀利祿稍舒尸饗之歎聊報割荻之恩斯爲快耳所慮者煙霞之痼酒肉不能療也詩書之癡聲華不能愈也古人云刻鵠不成尙類鶩畫虎不成反類狗此僕猶旁皇瞻眺而不敢爲者焉足下早擴管蠡之見素通著莢之書我雖異事及爾同僚盍爲

故人決之歲云暮矣根觸杳乘拉雜成書惘然累日

游西礪橋記

天地之置物也未有得其平者也常人昧之智者惜之觀諸山水知其凡矣平原簣土高可及肩市梢尺溪陘不容棹而雅流被以盛名充隱藉爲捷徑翰墨吟績志乘摺撫遐邇馳譽居之不疑亦有岩壑勝概近在几席林泉夙病深入膏盲而埃俗阻登嘯之期笠屐敗壺觴之興優游歲月卒未一到者至若奇峯絕島廬霍低首澄波白石瀟湘改容而祖僧者流馳情利藪咕嗶居士域足里門甚或半月之池鑿以溉田孤生之桐析爲爨火遇合奇偶顛倒類斯青溪山雄水秀甲於淞東出西郭三里有西礪橋焉居民隔江鑿溪上承山瀑下引江流茅舍竹籬間栽梅櫻溪源瀉瀑如奏金石山麓十里徧種雪梨蓋村民業此資生也方春和時黃鳥互鳴白鷺出浴淞溪信步如入香海而訪之邑士目爲恆溪聞語熱人喘爲迂誕獨余與二三同志流連洄

溯終日不能去云噫斯遇也其余之幸耶抑山水之幸耶是余之幸而山水莫余德探奇弔怪貽世俗嘲笑資耳謂山水幸山水無吾而未見損其遇我亦未見加也然則雖遇而如無遇也悲夫

擬修復揚州文匯閣鈔藏賜書記

方 宦

竊維神經燦列衡山探玉牒之編祕記流傳紀國啓金緘之冊著昏昏而傳恣恣上炳奎躔賅藉藉而博云云窮搜井坎是以廣儲梯裝貴於千石之官坐擁縹囊侈於百城之國墨翟遇弦唐於岐路載車即足稱豪徐馮詢王壽於周涂藏篋豈云非慧然而私家聚訟焉知廣內之宏編祕府收儲實具古來之燼簡周重守藏之史漢建寫書之官瓊箱則輦致鴻都牙軼則籤排麟閣兩京之盛衆經填委於都中六季而還羣籍紛羅於江表大抵蘭臺祕密蓬館森嚴多黃香之所未窺半王粲之所莫識從未有宏開策府普惠藝林特繕全書分賜行省如我 朝者也 純皇帝懋典學之勤成右文之盛

假十年之休暇萃四部之浩繁編排甲乙丙丁藏俯淵源津溯以江省爲人才之藪而維揚尤文物之邦爰 命諸臣照繕一分皮之行宮之側比諸石室之藏驟積琳瑯永付長恩之守紛來句率得窺中祕之全文匯閣之有賜書由來舊已曩者潢池不靖井里爲墟茲邦適當其下游斯閣亦淪於浩劫大航故簡隨燹火以俱灰老屋殘篇共塵沙而並逸倏徑十稔適際 中興燄息鴟苕聲歡鳧藻閭井之殷繁如故膠庠之樂育尤宏宜復舊觀聿成盛舉遺墟榛莽庀材仍放其規散帙淪亡標目猶存其數責絳綱以舊例厚集泉刀準書局之新章預籌筆札斯足儷瑯嬛之富而厭巾褐之私者已矧夫炳耀斗樞駛靈井絡邗溝一勺昔號多才蜀阜千重夙稱望國闢徵君之館副當年謁者之求登太傅之堂膺沒世達人之號自雍乾嘉道而降代產英賢數焦劉汪王之儔世宗哲匠豈不以沾溉膏馥采撷英華積儒人汲古之切應 昭代同文之運於茲不廢必大焉先然則藝府崢嶸踞淮海一州

之勝經郭完好成江河萬古之流一百有五年之曠典如新南邦竹舞四萬一千卷之全編具在東壁輝煌

擬徵訪江蘇先哲遺書啓

方 宦

惟大江鬱奧之區當 昭代休明之世獵書林而闢路漁學海以沿波導盛美者二百餘年闡志潛於十有一郡先賢先儒之所產允紹淵原 文宗文匯之所儲聿光潄裔繁昔名山几杖橫塾纓綉攀響前聲接光遠燄達衢九達齊玉軼以交馳壇坫百城奉珠槃而迭長則有許鄭絕學博通諸經左班功臣流覽羣史諸子競出睥睨乎百家別集單行皓晰乎千禩撰略備流傳甚遐其精英可方之古作家其淵富亦甲於他行省然而星霜歷劫燹火成塵邱遲之尺錦飄零謝傅之碎金厯亂詢安世之三篋趙壁難完問惠施之五車楚弓頓失叢殘故裘都歸敗鼠籠中牢落零縑半付飼鴛架上傷哉五厄浩然三歎夫以鞠明究曠凌寒趨燠晝涉藩溷夜眎屋梁層腐齒脫而

後能言精剗神敏而猶未已滔蠶垂盡經營作繭之勞筦豹全窺辛苦留皮之語孰不結蒼涼之奇抱含孤迥之靈芬卓成一家自期千古顧令延津劍去合浦珠遺經蟲沙猿鶴以俱空對草木禽魚而益憾所冀甄搜闕佚掇拾畸零鑿晏嬰之故楹發蒙穀之行篋或以傳薪之派哀錄師承或以肯構之賢儲藏先澤或副墨傳諸好事或遺徧發於所忠徧徵柱下之琳琅不吝河閒之金帛若封散帙何妨護以紅霞笥束靈經或者逢之蒼水供梓桑之珍弄景彼遺徵付梨棗以雕鏤矢茲宏願九京可作皆鏤肝鉢腎之精靈萬卷如新勝掩骼埋胔之功德

玉龍詞自叙

常熟楊朝慶雲史

原夫詞者始于詩人源乎樂府採其遺音以爲新律是以平林寒山倡清聲于天寶小山重疊兼妙什于金荃五代之際淵乎其文承班太尉之流學士舍人之輩並皆織冰綃于泉底醉艷思于毫端言歡則絃管如聞緬恨則春

華亂落紅樓別夜寄薄怨于相思金鎖重門總哀音于故國其聲閔而意遠
言富而思清者惟李後主實爲之最及乎有宋作者彬然玉宇瓊樓曉風殘
月張三花影秦七微雲並擅新聲都成鉅著然而南唐家數北宋諸公辨厥
淵源實分涇渭如周秦文章置之五代漢魏詞賦異于六朝其氣辭渾厚藻
彩瑩明粵惟南唐莫斯爲盛僕臨川年少江淹才無雅愛倚聲時滋披覽既
愛南唐尤慕李煜乃如博覽花雨服飲雲露水石遜其幽思風竹助其清響
于茲瀏覽心乎愛之爾乃少長京華十有餘載簿游江右手焉流連則或俯
仰江山感懷今古悼嘆往哲思念儕輩則有黯然而悲慨然以思者已況夫
元亮有桃源之託伯仁有新亭之淚瑤琴一枕不足導其情素長笛三弄無
以暢其衷曲至于春明物華散開煙月江山送別樓臺餞春與會所至歡感
所極往往潑酒于墨折蕉爲楮且書且吟不能自己春愁暗暗秋夢沈沈詎
有相思曷云惆悵聊爲弄筆時有愁篇非無有感之辭亦爲緣情之作願爲

感事用少陵秋興韻

萬木蕭疏霜滿林登樓氣象自森森雲連樹壓日將暮風挾濤喧天欲陰一
載榮枯千古事三秋節序百年心六朝多少笙歌處夜夜聲聲明月砧
弱柳堤邊禁苑斜蒼茫浙水感年華我嗟鐵鎖金陵地誰泛銀河玉宇槎白
羽將軍朝拾箭黃河戰士夜鳴笳漢家城郭吳宮殿寂寞江干開豆花
危磯石簪映斜暉燕子高樓樹影微馬首東來鹿西走雁聲北上鵲南飛中
原善戰廉頗老宣室求賢賈誼違繡鏡錦鞍好馳騁戰場賸有草根肥
乾坤變態一枰棋塞上秋風宋玉悲黃髮老軍思故里白頭宮女話當時千
家豺虎雲屯遍萬竈貔貅露布馳半壁頽垣半流水蘆花荻絮寫相思
是誰整頓舊河山日月重輝淮泗間十九人爭毛遂穎三千客渡孟嘗關藤
燕有幸依芳渚槐棘惟知近御顏草木無情偏有憾洞庭留得竹成斑
封侯年少說羊頭獵馬嘶風天地秋木落草枯邊吏感荒城廢隴小民愁碧

梧葉墜難棲鳳紅蓼花深隱睡鷗聞道旌旗誇奏凱鼓鼙聲裏過涼州
數奇李廣本無功得失雞蟲轉瞬中香草美人湘水月飄蓬遊子楚江風菊
離送酒衣傳白楓徑停車巾映紅自古英雄多曠達騎驢湖上有村翁
秋色無邊客路迤落紅堆砌綠平陂荒村古寺牽蘿影父老兒童唱竹枝兵
甲氣銷南國淨林泉文好北山移夜深階下瞻河漢牛斗光芒萬丈垂

送別梅橋五叔

江草雜江花江邊別恨賒四年如過夢一見當還家
閩水帆朝泊吳山鼓夜
搥匆匆悵分袂明日各天涯

劉 棹 劍侯

歲暮雜感

晚風吹雪上梅枝又了今年一局棋有客倚樓聽臘鼓誰家秉燭待春曦
牢愁欲破須中酒結習難忘且祭詩自笑閒鷗浮宦海出山猶似在山時

蚤年意氣貫長虹得失遑論塞上翁朝局頗能覘島國罪言曾荷達 天聰
余數上書言事由工部都察院代表 枕戈志願何時遂聽鼓情懷舊歲同何事又吹春草綠最
無聊奈是東風

九九消寒迭主賓吟壇香火總前因尖叉略韻千篇富脫略論交四座春豪
飲甕澆胸塊壘狂歌時露骨嶙峋歲除未辦黃羊祀爲語王孫且莫瞋
百尺金臺易水邊市來駿骨幾多年乘槎使者皆殊賞採藥童男盡列仙豈
但畫皮求貌肖要須管膽報恩偏獸尊明日趨踰地好奏雲章第一篇
漢家累葉舊威孤擬剪鯨波靖海隅豈謂尺書招贊普翻教歲幣事單于饒
狼早噬三韓國唳鶴頻驚舊帝都欲鑄干將無巨冶春來放膽醉屠蘇
庭閣夢繞又觚稜欲報君親病未能雞肋何緣營薄宦豬肝常媿累良朋卻
欣六出花爭放預兆千倉穀早登聞道江南江北地嗷鴻無數臥寒冰
三年梁苑卸征鞍嚼蠟因循戀一官白鐵鑄來成錯易黃金擲去度針難漫

携芒屨尋春約要有松姿耐歲寒風雲滿天殘臘盡衙門知臥幾袁安

宦途學海總蹉跎爆竹聲中髣髴昔載鴛鴦花都似夢半生人墨兩相磨空

談時事慙捫蝨頗解新粧懶畫蛾讀罷楞嚴仍故我說經孤負老陳那石陳

觀摩石溪研精內典餉我楞嚴經細讀數過深
窺奧透而未的實行說食不飽之譏胡以免焉

白髮

男兒四十殊非老鏡裏俄驚白髮催兩載塵砂餐汲水廿年風雨夢燕臺屠
龍技術知何用奔馬光陰去不回夜半干將忽騰躍問余萍匣幾時開

綠梅

渲染春光百卉前園林幻作蔚藍天西山有客張青笠東閣何人拾翠鈿一
色自聯松竹友九疑真見萼華仙玉人欲折還停步認是枝頭葉裏煙
烟橫庾嶺未全消擁出螺髻色太嬌疏影本來名綠意芳姿端合住藍橋袖
單斜倚風前竹艷冷翻欺雪裏蕉湖上通仙應顧笑天然眉黛不須描

黃兆枚

芥澹

人日感懷

梅蕊更從春際活山根漸見雪餘青崔瞻侍酒方簪筆陸羽烹茶自注經近
火寒身猶兀兀點霜玄髮已星星剪形戲向屏風帖人老難邀筆硯靈

和沈南雅松江第一樓題壁二首

古樹荒村亂插簷斷煙淒淒結老蟬瘳河山一抹殘陽影竹柏孤懸晚歲心白
水松花分路入青編樺葉擘箋臨此邦亦有風流意繞塞黃雲萬里深
舊部諸兒可實邊空林簫瑟到今憐野龍戰膽玄黃血風鶴時驚甲乙年雙
手截犀誰警敏萬家搜鼠又狂顛最愁遼瀋通燕薊春草榆關一道連

和瞿園見贈

翩翩蛺蝶向空浮已分才人寵魏收衢底蕭然老朝士眼中安有大諸侯貯
瓶澗水分江入垂野天星背月稠無米折腰猶未可況余官俸不須謀

南河避暑

野色帶山氣水波明岸沙煙尋盤折路風醒寂寥花籬落神仙犬池塘鼓吹
蛙散衙無一事南館笑浮瓜
此地僻逾靜偶遊思便深樹頭蟬語綠藤腳蝶魂陰臨水花窺鬢歸雲山有
心還勞故園叟一撥酒餘琴
清晝午窗前疏風細細穿簾痕涼似水山翠遠於天細草圍馳道殘萍帶斷
船傍花諸事懶閒煞馬頭鞭

將改官次瞿園韻

獵火橫燒後空郊落虎斑埋丹九轉鼎度影百盤山一夢驚天缺千夏入國
艱我行君亦去同有涕潸潸
京洛老詩客春風又一年抽身如避地開口已驚天落想空塵表懸憂在筆
先江波浩淼動知似九街前

李德星

景輝

和方玉山感事韻

時局已殘喘君才猶壯年新懽燕市酒往事大羅天戟笑馮唐老鞭看祖逖
先人如春有脚到在百花前

秋雲

秋來雲氣鬱蒼蒼斜界羅紋爾許長萬樹寒蟬聲乍噤一輪皎兔黯無光儼
然紺宇開圖畫欲向黃姑乞報章變幻陰晴分頃刻且從薄處受新涼
天然畫稿不須刪出岫無心自往還世事卻同蒼狗幻雲容偏與白鷗閒巧
成羅樣波千疊錯認眉痕月一彎徒滓太清供點綴何如收拾入巖間

畏吾村訪李西涯墓

一生不作批鱗語名位堂堂老相公坐使貂璫移國柄但將鴻筆付詩筒謝
劉幾輩抽簪去威武當年補袞功指點畏吾村畔路殘碑猶照夕陽紅

和瞿園元日感懷四首

紛更時局變朝簪人貴知幾鳥擇林始信補牢非晚計甯將擇機負初心
名鷄肋歸平澹入世蛾眉問淺深臥雪家風自高潔若論作宦豈宜今
歲序催人斗轉躔多君馬齒早華顛居憐湫巷成雙隱詠和竟裳閱九年
首錯疑天可問論心期與石同堅何當共踐歸田約會仿耆英鄉社連
前身慧業蕊珠宮誰謂詩人命合窮晚菊香吟韓魏國早梅讓應宋沂公苑
枯未必皆天定塵滓殊難與世同本是淮南舊仙侶移家暫別五雲中
乘楂得路底須占吟續黃州蘇子瞻秉性稍平薑桂辣茹貧翻覺董茶甜封
翁種樹多留蔭仙吏栽花不礙廉撰句竊符敦勉義莫將才盡笑江淹

文文山祠

趙宋已無乾淨土先生義旅獨勤王誓將厄運回陽九不惜捐軀例國殤正
氣一歌河獄壯崇祠千古藻蘋香那堪異代同嗟恨嶺墓梅花輝映長

橈雙槳載酒橫塘野水通潮孤歡深淺難量情絲一般委地欺游絲無力飄
闌簾影外看嫣紅飛上海棠

一萼紅 芍藥

殿羣芳勸天涯遊子一醉餞東皇錦帳圍燈玉餅盛露憐此婀娜深藏記明
月紅橋廿四番花會歌舞夢維揚再世宮姬十年宰相何恨興亡 小立欄
杆悵西園風雨轉瞬荒涼纓綫飄零珊瑚粉碎多少珠淚難量只恐豐臺豔
骨燒絳蠟無力弄殘妝莫忍心孤負有限春光

鶯啼序 感春用夢窗韻

哀鶻一聲破曉啓珠簾繡戶看芳草十里亭臯了了心事遲暮便尋取如煙
好夢春陰已換天涯樹願相思攬入晴空半天飛絮 倚病臨妝攬鏡照影
悵鬢煙鬢霧問消息書寄江南倘憐蘭惠心素拾枝枝紅愁紫黯要撻扇情
絲一縷漫重提泣鳳唳鷺早輪鷗鷺 埋香世界逝水年華悵天地逆旅細

數到十年羅綺本事詩句彷彿當階落紅風雨鈿車寶馬恩恩載得煙花三月揚州影趁來潮一葉沙棠渡夕陽也好雙雙燕子飛回爲巢苦銜泥土聲聲檀板淺淺金樽聽四筵白紵恐負了春江花月撥盡琵琶一曲罷罷儘歌舞燈前試問知音誰是釵梁敲斷黃衫杏更何心翻入瑤琴柱飄零同此天涯淚滿青衫問卿省否

賣花聲

風送馬蹏驕鞭影遙遙夕陽流水謝家橋鶯坐垂楊呼燕子重話南朝前路買香醪醉騎蘭橈一聲柔櫓一聲簫載得小紅歸去也同做花朝

玲瓏四犯

題隋黃美人墓志原拓本

寒食東風問舊日隋宮誰醉荒冢夜雨棠梨猶自漆燈孤擁回憶出事梁臺儘占盡綺羅嬌寵小名鐫上貞珉纔識斷腸情種六朝陳迹真如夢倚垂楊畫樓高聳投壺雅興彈碁妙凌跨秦娥簫鳳遐想縹緲仙游月冷凝烟

重展數行殘碣春恨遠墨花凍

陌上花 春燕

桃花落盡清明寒食一天微雨辛苦歸來風裏滿身飛絮珠簾畫棟人何在
不道興亡無數似微聞一曲春燈零落尙翻樂府營巢情太急雙雙玉影
竟傍尋常門戶有幾多時飛舞已豐毛羽花濃葉暗闌干曲忘却當年來路
更何時盼盼樓中纔得淚銷金縷

戴述經

字惺吾安徽望江縣諸生
著有雷岸隱人詞一卷

祝英臺近 秋感

柳風疏梧雨歇秋意沁人骨暮靄沉沉涼鴈數聲徹幾經送別江南迷茫歸路大半是蘆花飄雪正簫瑟又早一片商聲飛揚晚颺發似夢如烟愁思暗中結甚時蕩掃癡雲長空萬里君共我關山明月

戀繡衾

今讀續
蘆花飛處霜滿天倚闌干人怯獨眠對一片黃昏月聽鄰家琴十二絃暮
愁密似秋煙結攪情絲剛斷又牽報夜半西風起把鄉心吹到鴈邊

采桑子

春風十里蘆蕪路往事蹉跎衰髮婆婆酒淚琴心入夢多閒情付與閒鷗
鷺江上煙波月下漁歌盡日安閒理釣簑

李恩綬

字丹叔一字亞白晚號訥齋江蘇丹徒
縣人附貢生著有鏡月軒詞錄二卷

鵲橋仙

秋聲

賓鴻乍聽吟蛩如訴一幅廬陵秋賦西窗悶坐剔銀花又幾點梧桐細雨
鄰砧遠搗霜鐘徐度攪亂夢魂來去狂聲風起夜潮生月落在蘆花深處

鵲踏枝

無錫舟中賦春柳

弱線依依春弄影畫艣搖過衝破黃昏暝二月臯橋先有信酒旗青處東風
緊近水樓臺重記省帶雨低垂欲繫遊人艇萬縷烟痕縹不盡絲絲綠比

吳娘鬢

唐多令 同節齋詠雁

秋信老湖濱蘆花淺水明鷺聲聲破曉寒鷺一陣橫斜殘雪路能催得洞庭
晴淡月更疎星孤燈半壁青盼家書旅館淒清無奈羈人聽不得慣勾起
故鄉情

湘月

陳琳墓懷古

墓在寶應琳邑人溫庭筠有過墓詩

白楊蕭瑟愴荒墳下有當年瓊傑一紙能襯奸相魄曾代袁家書檄壯歲干
時霸才無主君意知騷屑墓門花落杜鵑猶解啼血遙想溫尉經過臨風
惆悵詩句親題碣琴劍從軍名士願同恨年年戰伐鴉浴寒流麟埋衰草誰
護詞人骨有靈與否一鞭空弔殘月

轆轤金井

袁術墓懷古 墓在寶應治南

三公家世到山邱都付綠苔碑碣睥睨當時惹帝王情熱非盧臥雪關何似

今詩
乃翁清節識信當塗君家競爽相逢羞說而今墓門悄寂喚陳琳地下再
話書檄天斬孫郎便難稱豪傑術書歎曰使術有子如孫郎死復何恨江山土裂但空付一坏
殘月管甚興亡英雄夢醒數聲啼鴉

惜分釵

音悲暗聲格磔家在江南喚歸客憶關河慎風波欲行不得偏奈愁何哥哥
芳草渡飛花路叫到鈎輈日將暮蜀烟昏楚雲屯千山啼遍五字聽真聲
聲

水龍吟

水龍吟 郡城北郊同鴻甫寫望
跨鰲門外斜陽餓鴉叫處猶鳴鏑戰場草沒禪庵鐘冷都依雉堞錢塔猶存
石甌無恙但撐空碧看寒潮一綫激揚嗚咽聲似打瓜騾 噪晚譙樓鷓鴣集
慨江南腰餘半壁旆捲波涼笳吹月墮紛爭劍戟三國衣冠六朝宮殿更難
尋覓悵臨風管甚英雄割據昔年陳跡

疎影

疎影 春柳用竹垞翁秋柳詞韻
馬行低首任長條亂拂鞭影馳驟忙費東風着力吹齊綠煞斜陽亭堠紛紛
點點楊花亂偏恰趁餞行時候聽酒邊三疊陽關親向灞橋分手 總過江
村寒食怕愁滿鏡裏休照溪口張緒年華未染青衫樹至今依舊綠陰冉
冉和烟嫩遮得住碧紗窗牖喜玉人軀體加豐差勝去年腰瘦

羅敷媚

羅敷媚 冬夜寄內
剪刀聲裏銀釭小風信寒生衣倘催成忙費工夫到幾更 火熏鉛鐸心借
熱憶遠關情恨意眉縈皺比衣痕熨不平

月華清

月華清 客安宜詠雪同寅卿
急灑簾旌碎黏畫幌楊花嬌鞞無主道韞才高冷笑尖叉韻苦儘坡老白戰
精神也難學聰明言語凝佇怕峭寒侵上那人眉嫵 惱我布衾成鏡聽落
落蟬聲夢烘燈炷酒價頻高愁煞旗亭伴侶問王郎羌笛新詩可攔入雜爨

今詩
細譜誰與悵飛鴻泥爪頻年羈旅

翠樓吟 萊莉

搓雪玲瓏團香醖替齊來鬢雲簪就鏡匣妝欲禪正風月晚涼時候枕函薰
透問同夢今宵花心開否相思瘦向卿私贈怕人偷咒 雅友袒露欵烟喜
半銷殘暑半銷殘酒聲聲聞喚賣最好是秦淮巷口隔河招手記簾捲斜陽
新妝巧鬥眉休皺至今小玉如花依舊

本蘭花慢 孟夏同竹坪表弟遊蕉山

時清重到此難覓我舊題詩正枯本堂前波恬風靜鐘渡江遲情移山光豁
若喜入雲深處翠沾衣四月鶯啼叢篠六朝僧榻殘碑 滄湄吟翫可忘飢
心事白鷗知挈冷朋三五焦公洞畔同話襟期凝思評今弔古可還能今夜
宿弗茨倚月聲吹篥笛當筵味嚼銀鱗

飛雪滿群山 臘杪金壇回車時大雪甫霽

鉢腎雕肝吹花嚼蕊可憐辛苦年年豈紆遠志稍遮俗昧恁時名氏纔傳瓊
瑤車踏遍勝如東郭先生履穿幾點寒雁一林凍日依舊聳詩肩 想此日
湖光平似掌有數椽矮屋無異鄉園候門稚子倚闥老母也應笑憶燈前風
塵頻作客待歸伴梅花醉眠華陽道上何人今日償酒錢

長亭怨慢 與周生行貞經萬柳堂故址徘徊久之

已過了清明寒食蕙見楊花笑儂為客樹繞牆低斷橋猶認子雲宅昔年裙
展曾飛過觴千百驟雨打新荷 曲名用元時廉氏此柳堂事 勝殘月秋風悽拍 京國且
攀條泣涕此柳為誰憐惜詞人竹垞 竹垞飲此堂詩最多 問青眼可還相識最可欺丞
相名園只留賸殘磚題額邨堪說誰氏羶腥孤墳三尺 都門近有英人墜地種柳亦題此額

吳敬義 字篤六浙江錢塘人道光庚子恩科第一名進士官右春坊右贊善著有紫微仙館詩餘

霜天曉角 題汪鑑齋同年秋花圖

短短籬根暈疏烟一痕烟外幾叢花影知有箇訪秋人 西風寒鬢雲冷香

結翠裙莫倚曲蘭干畔斜月上最銷魂

金縷曲 題勞宜生同年重清曉行圖即送其之官楚北

我亦緇塵久算頻年驟鋼鈴語曉行時候爭似江南殘月岸十幅蒲帆春縹緲
最無賴東風依舊已是閒愁紛如絮送行入更折橋邊柳迢迢去楚江口

凄然重把離筵酒渺天涯垂虹一曲河梁携手落落晨星三四點催去征輪
風驟遙屈指水程烟城聞道江干黃樓好問樓中仙鶴能來否琴樽樂幾時

又

喝火令

蟬壁揩新粉猩屏暈淺紅輕陰庭院晚烟籠覺道春風一剪斜掠鬢雲鬆

影瘦偎燈悄情癡倚枕慵熹然前事上眉峰一樣簾櫳一樣小樓東一樣樓

桃花影涼浸月華中

錦堂春 題錢崙仙前輩玉堂歸妾圖

蓮炬分紅柳衣染綠仙郎合住高寒伴索娥清影人月同圓借取凌雲秀筆
朝來小倚屏山向窺花廉底蕉葉窗前澹寫雙鴛 錦堂春正佳麗編瑤階
烟綺蕊珊瑚一縷香痕融袖淨裏宮紈玉鏡奩開寶鳳瓊簫韻譜和鸞占神
仙艷福壓倒人間彩帔花冠

桃源憶故人

香泥軟印鞦韆痕透階下碧苔鋪綉落了酴醾花後小雨今朝又 困人春氣
濃於酒一桁簾波風縐簾外東風依舊只是春人瘦

童 閏 字補蘿一字雨秋號一廬江蘇江都縣人著有一十六番花信館詞鈔一卷

滿江紅 送葛水天之白門

秋色淮南又剛是別離時候看陌上西風葉落夕陽人瘦古樹鴉啼荒店晚
飛塵馬足鍾山走莽天涯容易斷人腸休回首 心莫醉金陵酒愁莫折秦
淮柳縱江城如畫親朋非舊五夜新霜欺白袷一燈殘夢燒紅豆訪烟花何

日下揚州重携手

踏莎行 春暄

舊夢難忘新愁誰訴夕陽芳草江南路小樓簾幙捲東風洞簫吹落紅無數
楊柳津亭桃花門戶依稀記得分離處三春鶯燕不歸來天涯但願人如
故

月底修簫譜 秋陰

雨溟濛烟霧屨衰柳鎖寒碧斷續涼蟬露重咽無力倚樓望眼迷離雲羅千
疊倩誰問征鴻消息 破沉寂欲把帚掃天晴還吾舊星月忽地風來墮落
井梧葉恨他鵲噪無靈蛩啼如泣卻爭奈編人愁劇

今詞綜卷三終

瀏陽賀麓僑大令 詳麟 咏鬚句云封髮誓詞勞共守到頭親愛許平分殊見
語妙律詩多奇語為宋元人展齒所未到五言則日高扶塔立風旋挾沙圓
敝衣和虱典霉米帶蟲炊膠牙新炙餅暖脚小薰籠七言則檻外雨喧沾酒
展街前風颺賣漿燈身耐風饕僧捨肉面蒙蛛網佛無顏燐火夜飛龍洞雨
颺潮春撼虎門山皆工

瀏陽詩人麓僑而外有李雨亭少尹 德新 劉濡深茂才 善澤 皆有奇氣李薄
宦粵東濡滯廿載齋志以歿劉哭之有輒喚奈何成吏隱百無聊賴以詩鳴
之語極為沉痛李贈人云憐君匹馬走風塵悵望羊城感慨新生死交情歸
處士滄桑世界託孤臣故園兒女應回首異地干戈漫愴神欲寄尺鱗問消
息烽煙萬里阻行人劉西郭外散步云野煙翻鳥墮高樹掣風聲秋色一城
雨夕陽雙浦晴洲荒人牧馬世亂鬼談兵余意將何託塵心觸未平隄上云
長隄紆繡界紅橋賣酒青旗柳外招日暮江南望江北煙波無際海天遙均

琅琅可誦劉警句如水流無定相帆掛自然風籬篩花影瘦蟲語豆棚秋
雄雙劍白肝膽一天蒼一池水瀉梨花月三面樓當柳絮風世俗何人知郭
隗英雄有淚弔荆卿新秋塞北霜華早故國江南夢境深置之甌北樊榭集
中殆不可辨李斷句客思入秋多五字亦妙

都昌胡雪抱元珍詩思沉毅好擬莊屈近作揣摩定庵有不俠何能焚筆硯
湘牋叠叠涌愁來棗花簾北絲絲雨素袖名香自鑄詩其刻苦可想百花生
日云碧雲何處不春深醞釀連宵紫陌陰往日蓮台堆四寸誰家寶幃護千
尋爭迷好夢如蝴蝶便學嬌嗔有翠禽一例承恩茵溷定幽芳應體大公心
和人情詩云繡被文茵錦覆之宵分雲液進雙卮銖衣自製連環結寶帶同
抽五色絲警夢殘香通梵意言懷賦語託宮詞愁彌慙笑歡彌愴何有生天
解脫時存問袁七云靜志澄思有夙根聲華馳逐眇何論水蛙近夢清池閣
塵蠹連牀蹟典墳病懣維摩無量壽書焚仲景不情言每持梁甫資匡益羽

扇功成合感恩即事云牀下小儲玫瑰酒壁間多撒水晶鹽勾留妙有談心
地紅豆燈深雨入簾夜次高郵云計程悄悄擁青袍油幕風寒鐵網牢凌雜
水聲堆一枕不知是雨是波濤中秋憶人云狂生被酒喜悲歌隔海心情費
揣摩破碎山河圓滿月有人花下話支那皆能自成逸韻不染近日新詩家
氣習可云鐵中錚錚者其從兄蘇存元賦詩筆亦清題雪抱錦瑟集云寶瑟
由來廿五絃雲和聲調走珠盤豈因求價能輕撥不是知音可廢彈入樂久
登唐典籍傳神如覩漢衣冠一從聞罷湘靈瑟江上青峯日夜寒
蘇存旅東京有袁鐵梅自章門寄詩一首甚佳去年今日今宵節海上分飛
各自憐濤雜車聲吞客夢風搖燈影盪春煙無多筐篋愁痕叠大好河山血
跡鮮此際珠簾儲暮雨可能和淚到遼天

叔父玉符微麟不喜作詩出筆均能超脫光七八齡初學詩叔父實口授之
佳語如秋月云天教寒似水人已瘦于秋濤暑起句云天氣不蒸兩燕雲

滿天夕坐云雲垂天撲地月瀉水堆山偶成云出世不如乘下澤逢人每愛
讀南華但見月明能悟道每于春去倍懷人餘不甚記憶叔父生平性喜讀
善書有以六經證注太上感應篇二卷注莊一卷旁及陰陽醫卜抄錄皆有
心得澹于仕進近年專講黃歧術恆謂光曰但存濟人之心作官作醫一也
光書此語爲座右銘

宋僧惠洪與其弟超然論詩超然言古人如山路原無兩空翠溼人衣欲別
更携手月明洲渚生等句皆得天趣惠洪問何以識其天趣超然曰能知蕭
何所以識韓信則天趣可言此語雋而有味志之

陶集中極沉痛語甚念傷吾生正宜委運去且極今朝樂明日非所求既來
孰不去人理固有終世與我其相遺復駕言兮焉求意極達而痛極深曰無
求曰遺世在陶公則爲佳詩他人仿爲之不可謂非憤世矣陶曰世與我相
遺陶處此世固當鳴此詩也書此以語學陶者

新會黎篋庭

維縱

工于詠物如盆荷云花生佛界瞿曇鉢香在田家老瓦盆

移竹云易地胸襟仍灑落置身泉石自清寒苔云月影半庭花落後屐痕三
徑客來時蠟梅云千秋玉照籠雲母一簇黃冠伴水仙太息揮鉏無白帽徒
聞惜玉有黃衫皆佳朱五樵秀才詠物尤有寄託爆竹云汝身終敗裂切莫
恃聲名傘云諸公形跼踖籠罩在當中扇云莫笑生來輕薄質許多人在下
風頭吸煙云試問吸來旋復吐一番唇舌爲何人背面美人圖云憐爾不知
身後事旁人看得太分明皆寓諷世之意言雖俚而有味

永新童子姓程名小樊其母夢樊遲而生詠月云團欒十五月中央安得平
分剪一方終古不圓都不恨只期夜夜有清光年未冠而亡此可與詠三十
月之神童蘇福輝映千古

番禺諸生戴少彭永落拓不得志詠蚓云處卑仍自潔得氣亦爭鳴具微身
身分又寒燈云每憶兒時書味好誰知客館旅心孤秋荷云聲疑響屣涼生

籟影怯凌波月有痕亦佳

番禺卽柏軒慶時詩有清才讀南史云江左由來文物華美人香草自成家南朝一百七十載開盡詞壇富貴花其母屈氏名鳳竹蚤年守節能詩抄文選唐詩若干卷抄書云奇書難盡買一紙還借書書亦難久借黽勉爲鈔青手錄勝梨棗差免訛魯魚抄時已細讀經心能久儲一字一疑注一語數躊躇錄成加丹黃心目更自舒異時備考核故物逢其初我腕疲亦樂稽古長與居信爲自道甘苦之言詠白蓮有句云憑誰爲寫瓊英照妙筆非秋畫不成殊妙

湘鄉曾中瓊女史紀燾文正公之女適陳氏早卒有紫琅玕院遺稿酷暑云三庚起初伏杲杲赫曦蒸羽扇難逐暑輕絺疑重綾池魚繞淵馳游禽覓林簷朝興怯炎晡夕寢畏然燈念我處廣廈值茲猶不勝嗟彼肩與負艱辛誰爲矜默究止足理清鐘自鏗眩逸然滌煩垢溽暑亦消激蚊云溽暑擾清興

避炎向花陰流螢沾野草飢蚊繞衣襟身輕飄柳絮吻利疑鋒針飢驅日擾擾未飽已遭擒藉物微物性聊述貪婪箴獨酌云極目覽層霄皎然無片雲明月映苔砌簾影漾波紋遠鐘聲斷續微颿吹芳芬此樂浩無極有酒不辭醺悠然入清夢何處着塵氛走蛟云淫霖竟匝月征人行路難桑田將爲海怒蛟起蟄蟠青黃滿四野泥沙相摧殘農夫失所望村舍墻不完念此感我懷有酒不能歡兵後多凶年此理不可刊蠢然一微物安能興狂瀾古思綺縵具有至理不愧大家風範其兄惠敏公爲之序而存焉一鱗一爪獲付父兄以傳亦不幸中之幸也

上海諸生鮑思遠歷贈偷兒句云嗟君自肯喪名節愧我不能通有無又貧士某投某鉅公句云嗟君鼎食鐘鳴日不識人間一飯難兩用嗟君字皆有趣味

歐陽筠軒負作龍骨銘後四語云因人仰俯潤及涸土汝骨自堅汝心太苦

注龍骨卽桔槔之名何璧池若咏桔槔一首頗佳低昂還藉勢相迥深淺
頻探水一篙修綆未應妨汲短寒餅猶自喜鳴高因人俯仰思援引與物浮
沉任縱操何事漢陰勤抱甕忘機尙僕不知勞筠軒貴陽人璧池番禺人
張靜持茂才照諸鄉本理于口咏桔槔云機心苦運太圓融俯仰隨人計自
工能爲上天作霖雨不妨長處濁流中張貴筑人

番禺卽橋樵以家以家養牲畜爲業得錢卽以膳母作詩有淡致錄其
題蘇文忠公思無邪齋云日出豐湖間悠然見林谷波光涵一片蕩漾上茅
屋寫此冰壺心中情以穆有思皆有邪無思乃土木思而無所思心齋悟
來復一室誰晤言以矢弗告

國初黃九烟周喜嗜鑪底焦飯人因呼爲鍋巴老爹九烟賦詩云竈養幸
無郎將號鍋巴猶得老爹名兒童相笑非無謂慙愧西山有此身學仙恨少
休糧訣嚇鬼空多噉飯身如此老爹應餓煞鍋巴敢望史雲塵隔江船尾競

琵琶金帳甯知雪水茶新婦羹湯多得意老爹自合嚼鍋巴哺親焦飯記先
賢苦節多存感慨篇莫道鍋巴非韻事鍋巴或藉老爹傳九煙江甯人崇禎
庚辰進士除戶部主事甲申後歸里故詩中多諷刺之語

侯官曾伯厚大令由進士用部曹改官知縣官夔門數載解組歸里士
民咸誦思之伯厚賦詩云企古循良縱未能眼前赤子忍欺凌案無積
牘心猶歉獄少冤每於柁鼓稀鳴人樂業籌車滿祝歲豐登臨歧持此
區區意愧謝斯民稱佩稱祖訓作官箴清慎勤常懷到今不擾桑麻春
省俗只談風月夜戈船幸未開邊釁廣廈無能庇士林門外峽江澄澈
水他年留證長官問閭疾苦要求通端在開誠與布公名且不貪何況利
過猶難免敢言功才輕自笑駑駘馬累重眞爲蝟蝮蟲爲語夔門諸父老年
來我作信天翁一年容易屆瓜期京兆休存五日思那有餘閒親翰墨絕無
分潤染膏脂但求事事心如秤敢說人人口盡碑莫道宦囊太羞澀壓裝珠

玉送行詩藝門士人送曾詩佳者摘錄李馥瀛云瞿唐灑灑頌聲同閩邑民
情喜盡通惠愛堪登循吏傳清廉不愧古人風哦詩有暇琴皆韻判牘無私
鏡自空鳧鳥異時如再到更將政績繼文翁萬伯陽云傳舍從來不久留行
裝整就去夔州清風兩袖標廉節春水三篙送別舟輿誦同聲稱父母君身
有骨傲王侯陽關唱罷初分手江上煙波一片愁朱學源云仁慈不讓古循
良遺愛山高復水長我登場三戰北爲人作嫁一年忙自知困處非生計
許否從遊附未光當日若無嚴武在窮愁誰識杜襄陽孫彥龍云卿雲飛處
便爲霖一樹甘棠一徑陰獄必得情懸鏡朗庭無留贖落花深廉泉讓水居
官法玉尺冰壺造士心頓使偏隅崇雅化鳳鸞那得久棲林吳錦文云琴劍
天涯慣習窮一官兩袖尙清風公廉共信張京兆祖武能繩鄭小同家具人
休誇北阮瓣香我欲拜南豐長江徹底澄如許想像虛堂鑑影空李春芳云
恨不將身化鷗鷺隨公日日上扁舟劉久齡云報道使君歸去也浣花溪水

亦銷魂譚錦帆云留得峽中明月在思公夜夜仰清輝

狸奴貓名陳後山詩話謂銜蟬爲貓名殊費解黃山谷乞貓詩秋來鼠輩欺
貓死窺甕翻盤攪夜眠聞道狸奴將數子買魚穿柳聘銜蟬銜蟬似物之初
生者之通稱不必專指貓也袁公道詩低枝藏小蝶深樹語銜蟬

謝元暉詩善作轉折語無論君不歸君歸芳已歇非君不見思所悲思不見
玉座猶寂寞况乃妾身輕山川不可盡况乃故人杯皆明爽適口不似六朝
人手筆

梁簡文帝折楊柳句云葉密鳥飛礙風輕花落遲語甚新雋唐杜荀鶴風暖
鳥聲碎日高花影重由此脫胎而出遂成名句簡文詠內人晝臥有夢笑開
嬌鬢眠鬢壓落花簾紋生玉腕香汗浸紅紗數語後來摹擬美人者無此工
緻

近日有狂生詠耶穌云十字吐靈光西方一家且襲古人天不生仲尼萬古

如長夜之語崇信彼教趨之若鶩此正長夜漫漫之會也張仲甄大令拜過孔林時孔廟火災有句云千秋萬歲薪傳火大地荊榛愁殺人語亦沉痛余梅岑原春作宦山左兩赴河工有前度劉郎之感清河酒家壁上題詩云此地曾經十載前重來村郭尚依然少陵入蜀詩千首王粲登樓賦一篇妄冀黃河清有日未知滄海淺何年填胸塊壘銷難盡兜上吟邊與酒邊五六語感喟時勢十四字乃是十四點淚也

葉中冷玉森客東瀛詠櫻花云西渤南溟無此種大和魂鑄海東涯八百八島佛都笑三月三時天亦花富士山祠靈髻髻吾妻橋水影橫斜獨憐禾黍流虬怨蕉萃寒緋玉女家案櫻種產于流球移栽于日本乃繁盛若此中土栽此樹不能久活豈天亦偏袒東人蕃生此花以媚之耶吳定叔子喬亦有句云春風爛漫花爲國吹醒神仙渡海來

吳瘦公數鄺海雪赤雅諸作奇麗可喜飛頭獠云孰使汝頭行萬重快哉天

授乃有此人人生覓食僅在口軀壳胡爲累奔走恨不借與樊將軍夢中先軫歸其元吁嗟此獠難撲殺絕脰斷頭安足嚇所謂飛頭獠者頭將飛先一日頸有痕市如紅縷及夜狀如病頭忽飛去須臾飛還腹自實其覺如夢鍊刀云金精淬鍊秋霜白珠鞘鞘光尙濡血生兒以命託佩刀祝爾他年能死國相看重拭鴟鵂膏斬蛟殪虎同吹毛持之所向無堅壘笑煞于思捲命逃印娘云日南野女顏色好飛雲采藥岩谷老雙成飛瓊信有之跨鶴驂鸞堪絕倒印纍且喜日隨身誤呼文手魯夫人不取黃金懸肘後教伊負腹笑將軍蓋豈宜以西野女居石洞白晳嫩好椎結裸跣皮若犢鼻垂腰蓋膝群雌無雄遇男子輒負去傾洞求合驚死者掩之生者復還故處泄其真氣壽至百歲緣崖走壁其行如風腹有玉印文類符璽是卽唐蒙博物志所謂日南有野女羣行不見夫其狀晶且白裸袒無衣襦者也

合肥有僧名野蠶者本姓宋工詩能畫有佳句云老屋夜深雨亂山秋後鐘

人間詩草無關稅江上狂徒有酒名又咏春草云綠淺香柔絕點塵亂如絲復疊如茵閱殘野火千秋劫鬪盡東風六代人池上有誰還得句江南無此不成春和煙和雨年時路知否王孫最愴神或云野蠶本諸生有文名因訟事官將褫其衿遂憤而祝髮亦可憫也

寒夜錄載明人董蘿石爲王陽明高弟子咏豆芽一首極佳蕪葦亭後得褒封金甲銀鈎奪化工瀟盡宿泉冰有骨種成深盜土無功秋涵素質瓊絲脆水泛殘衣黛粒空野菽紛紛登俎豆憑誰爲薦玉玲瓏

鄧瑞軒詠敗蓮有句云正自有心憐子苦更將何面比郎嬌涉筆成趣人呼之曰鄧敗蓮汪漱芳香動藝菊有句云九月風光開爲我一年辛苦瘦如君亦妙

綠天香雪詩話卷七終

辛未壬申間館於西城磚塔胡同龔淑雨閣學處閣學公餘之暇輒遨遊金鰲玉螭雪藕調冰其樂無極蓋磚塔胡同斜對西安門距金鰲玉螭甚近散步曉涼相離不過數武耳曾幾何時而閣學卒於皖學任所眷口亦分居四方真不堪回首矣閣學令姪達夫觀察已卯同年也候選在京性喜燈謎所作有尖字一條隱蒙經大小戴又婁豬艾猴一條隱蒙經爲南朝皆妥切有思致

依依似張緒當年隱古女柳如是周子謙陳心言作兩心同矣考柳如是本姓楊見鈕玉樵觚賸又別號影憐見珊瑚網明宏光時南京北里之尤也歸錢虞山宗伯爲簞室知書曉大義甲申之變信至南中時虞山告歸如是勸其殉國虞山不能用自赴水經救得免隨園有像贊七古記其事

侯官龔禹疇太史丙午舉於鄉至辛未始捷春闈入詞館最喜猜謎作亦佳妙田東方有主寺人瘡環一條隱詩經子車奄息太史所揭東方又有指關

相贈一條隱詩經予所蓄租韓崑珊極贊其有神與黃子幹牧童遙指杏花村一條隱詩經彼有旨酒可謂異曲同工均得指點之神矣

大興李夢九孝廉一號側笠道人鄉捷後七上春官薦而不售館於吾鄉鍾遇賓侍御處善猜謎偶談自作兩條扣法甚活動靈通道論語末章隱語語一問三不知臨事而懼好謀而成隱詩經二句不難難虎不敢馮河又述一條問晉室清談之禍唐初女主之禍明末流寇之禍能舉其人否隱四子三句不連何晏也則天也自成也

吉利吉利隱諺語雙料曹操又吳蜀合謀伐魏隱諺語兩下圖吉利又固一世之雄也隱國名英吉利按吉利操小名又名阿瞞近見某書載唐明皇小字亦名阿瞞

保定王子宮老儒也人極方嚴端正然所作謎頗有趣入字一條隱唐書此居王後又免字一條隱諺語有一點夠夠朋友

倭文端公由河南駐防孝廉登進士第海濤揆席相業炳一時京都正陽門內西城根舊有願學堂滿漢義塾歲久傾圮公鳩資重建廣塾舍開粥廠給孤恤殘各善事以次畢舉復於每月初二十六等日課士栽培寒峻作養英才以理學名臣爲斯文主宰嚴氣正性未聞其製謎也壬申秋晴潘惠南縣倅談及公之長子某司馬言事父母幾諫隱鳥名子規以遺事君隱書經遵王之路兩條皆公少時作未知確否果爾則謎雖雕蟲小技而忠孝之氣流溢紙上亦可知公之爲人矣

都下春燈每歲舉行秋燈不多見至冬燈則聞其無人矣戊寅九月七日胡棟華創爲小會與會者李小川侍御唐薇卿銓部韓子衡太史田東方水部鮑印亭中翰段可亭別駕暨余八人午初起子初止同人各帶謎百條猜畢醺飲燈施酒闌薇卿猶有餘興隨於十月八日聯第二會十一月間薇卿又自張燈兩次雅集消寒迄今回思竟成盛筵難再矣

唐薇卿謎乖覺隱四子是知津矣丈夫豈可常親嘴隱六才時乖不遂男兒願是皆從京諺乖字作婦女口解也按韻書註乖離也戾也背也凡乖者必與人始合終離自負能覺反謂人疑一說韓退之羅隱乖角字與今乖覺相反又按韓偓香奩集焚書坑儒詩祖龍算事渾乖角自謂詩書活得人據此二說則乖覺之名殊惡

人比黃花隱四字鞠躬如也按月令鞠有黃華乃秋菊也其五月菊花葉皆異色有藍白紅三種所異者獨無黃色此天工之造物也余愛讀前人詠五月菊詩似嫌陶令醉來就屈原醒二語真可懸之國門又有孩兒菊色黃而小與澗之茶菊相似另一種似菊非菊者名萬壽菊花有深黃淺黃二色淺黃者中多碎瓣墳起有似芍藥者佳其葉幹味甚惡使人不可耐魯人名之曰蠟子草未審取意

法源寺即唐之愍忠金元以來戰歿軍士皆埋骨於此今住持僧某喜交官

場時耽吟咏壬申秋館於龔淑雨閣學師處住持以文官果贈繫以五律二索和師及余皆有和章今隔十餘年詩已散失不復記憶矣五雜俎載北地有文官果形如螺味甚甘予嘗之殊不見甘形似蓮房子亦類葍又云類旗之馬金囊又訛爲檳榔遂以文官果爲馬檳榔不知文官果樹生有花色純白狀如銀杏馬檳榔則蔓生也余有一條西伯賜爵信然隱文官果壬午留京候試溧水濮青士太守時官秋曹延課其詰嗣南如等文南如館於嵩犢山閣學處犢山隨其尊人崇樸山將軍成都任曾受業太守門下者南如又本師訓庭訓以課其子兩代主賓淵源西蜀一庭詩禮沉澹嶺南輶轉相傳亦一段佳話也太守邃於金石學圖書彝鼎四壁古香公餘輒飲酒賦詩賞花射謎屢申法源寺看牡丹之約以病未有以應也太守調以七絕六首隨即走筆依韻酬之南如弟雲衣不甚喜制藝而留心歧黃問業於陸九芝封翁曾蒙許可壬午秋太守偶患頭痛畏寒泄瀉症醫皆按陰寒定方

藥煎將服矣雲衣力爭爲熱症改投石膏大黃羚羊角等藥頓效因重用涼劑服月餘竟痊殆哉岌岌乎微雲衣知醫太守歸矣九芝爲鹿邑主雪廬部郎姪壻雪廬廿年前程兩田學正文社中舊友也十五家同岑集序出雪廬手亦性喜隱語者青士天資極高惟刑曹提調夙夜在公猜謎之興頓減今一麾出守案牘愈勞未知五馬駢征尙念及白雲司風景否

大興王南坡教諭長厚老成不苟言笑與李子樸孝廉爲敬齋茂才爲莫逆交行年六十隱於醫曾在東南園段可亭燈上附條余未得見詢問再三秘不以告因談及敬齋兩條鼓鐘送尸隱諺語不留神請問其目隱諺語不惟眼面既現成裏亦生動敬齋識風鑑遊於廣受之蒙宰之門甚見重之其人可知矣

以流民扣鴻雁本肅肅其羽一篇意余有棲流所關閉隱詩品鴻雁不來一條爲張戟臣農部揭去後戟臣在薇卿燈上附條有離覆香囊一條隱志目

阿繡爲余所揭戟臣曰聊以相報也

京都麪餅小而厚無芝蔴者謂之火燒薇卿有城外麪餅極多一條隱唐詩野火燒不盡棟華爲余述之贊其極清脆有趣按餅名不一有謂之餠飴者有謂爲餅餌者統呼曰餅子相傳一縣令上房啖餅未熟與夫人口角甚至揮拳閱數日署中演戲幕友以此事說與優人曰能談書檄中格外賞錢優人曰諾少停演爛柯山記至朱買臣上任要打地保地保求曰小人年紀大禁不起了買臣曰你幾十歲了地保曰小人丁丑生買臣曰前月丙子生打過了何況丁丑幕友糾金賞之因麪餅一謎附誌於此

繆鴻初銓部癸丑會闈分部科名極早以微罪褫職猜謎之興老而彌篤然極個儻偶述一謎時值劇飲合座爲之噴飯乃襲人改嫁蔣玉函隱四子今夫蹶者壬午秋附條李小川侍御燈有一條便桶灑明油隱優人小水上飄亦堪發笑

大興俞子襄閣學有才子名少孤力學家極寒簞瓢屢空寒如也生平喜作謎如慕父母宗廩隱四子五十而貢連步升樓正三更隱小孩語關登閣登柳柳兒童相約看芒神隱小孩語你瞧那個牛人皆有情趣令煙筱玩祠部學有淵源尤工作謎爲同岑集十五家之一謎法一準先民

肉好各一謂之環隱詩品可人如玉文章可得而聞也隱易經夫子制藝劉雲浦揭去一封朝奏九重天隱唐詩早知潮有信金漱川茂才揭去孺子名穉隱石人倪二一樽在手對黃花隱蘇文攜酒與魚汪厚臣壽班揭去哀公館之隱志目蔣太史趙鳳瞻孝廉揭去曰癡頭不費一文錢坐得佳婦計亦良得隱詩品取語甚直吳溪雲典籍揭去學田隱六才秀才人情戴壽彭茂才揭去皆予甲戌所出條也

粵西張紹棠孝廉甲戌留京過夏喜猜謎有燈必到乙亥春余在三眼井出謎紹棠揭一條面姓偉隱易經一索而得女面尙別致扣亦極緊

備用脚向前踢之一足踢空猶亦不見由此週身寒噤頭痛喉腫醫不效病至三月而亡

鼠妖

道光間有富戶某世居保定省城既裕青鞋又饒白銀城中典當數十處皆出其家其餘各店不知凡幾至其家奇珍羅列如翡翠杯珊瑚樹又不知凡幾也食前方丈侍妾數十有子四五人皆豪於財悉遵禮法甚於富而好禮頗不以勢凌人一年某七旬正慶大設筵席宴賓演戲倍極繁盛正演戲間某忽得病席未散而卒賓客優伶盡皆走去其羣子及侍妾痛某亡之速倍深惜惋葬後常作經咒計欲超度其魂並常祈禱神明佑某冥福如是年餘而某忽至家坐胡床云吾兒及妾近日作經超度冥中閻羅因爾等之誠並我無罪而死大發慈悲放回陽世其羣子及侍妾疑且畏私議曰夫死於何形骸必朽何生之有况尸在棺何能自出一動念爾某已知喚子妾至

吾之生蒙上天鴻恩神佛庇佑食金丹一粒故尸骸不朽有神仙開闢身體得出不信汝等驗棺尸骸無矣驗之果然並言家中事財產數目親戚姓名一一不爽其羣子及侍妾大驚而信即驗其行亦與某無異然頗有淫行不似當年循謹也侍妾及侍婢無不淫之其子婦之貌美者亦淫之數月間閨闈大亂不勝其擾羣子侍妾怒其無禮並疑非某欲鳴官驗之一動念聞而某又知大怒喚羣子與侍妾曰吾之生活實一家之幸爾等正宜竭盡孝道殷加侍奉奈何悖逆天倫欲將父鳴官聚訟膽大妄爲爾輩將羣子痛打竟斃其一而姦淫益甚其子婦及侍妾含羞忍辱有自盡者日久其親戚里黨俱怒又因逼死人命與其子聯呈鳴官縣令大怒欲擒治罪密喚其子至堂諭曰吾聞某一生最好禮豈有淫亂閨闈逼死人命之事今如此恐非直活或妖邪假託形名取人精氣耳若不治恐有大害吾親到爾家擒之送諸上憲驗其真偽正言間而某至縣令大喜以爲伏罪方欲升堂而某忽上堂

方欲審問而某自投供方欲定罪而某自認罪令所欲言之言欲出之計念慮甫動而某皆預知令大驚反覆躊躇莫可爲計乃先收獄而某夜逃至家姦淫如故並益打人令怒極急遣役擒之而卒不可得令無計知爲邪命道士書符數張貼某門首符貼而某自扯下曰爾等以吾爲妖以符治我我何畏哉將符扯碎自書數張較前尤巨依樣貼之令大怒即選精兵數百火速往擒至家而某已渺逐屋搜之方得即擒到署視之非某乃總役也令驚疑無計乃禱城隍恍惚中有神謂曰某還陽並無此事妖邪假託無疑神通絕大凡夫不能治然罪犯姦淫天條不宥後必有人除之言畢而醒乃是一夢令因無由置之閱月餘江西正乙真人至道經保定入京行至縣止使人呼縣令至前曰此城有妖速查保甲吾將芟除焉令大喜心計曰神言驗矣即將某前事述之真人曰若如此難治也吾用力除即命在某宅築壇一所高三丈真人道服上壇法官數人隨之將欲擒某而某自投壇下真人怒目親

曰何處妖物乃僞稱人父任意姦淫壞家風玷閭閻實罪不容誅某曰我縱姦淫害你何事真人大怒曰汝不服罪吾誅汝矣某曰我道既成恐無法治真人愈怒曰妖孽汝敢與我鬪法乎某曰有何不敢即命法官與鬪真人下壇去某無懼容約數法官至家設席相待並令羣子相見旁觀之人無不駭異法官不喜將席間菜果攙合一處曰汝有法術不用手將菜果列歸原器即爲汝能某曰可但不許人觀耳請法官背席立頃刻而菜果各還原器法官大驚恐力不敵請真人助真人命法官用陰陽鏡照其原形某亦不懼從容照之而原形不現真人大怒用翻天印擊只見某身一閃一印擊空真人大驚急收印焚通靈符請先代天師至赤面紅袍現形碧空真人叩首倏忽不見乃供酒九杯以氣吹之而杯皆懸空真人問曰汝若能此吾服汝也某方得意亦欲懸杯中斟酒畢方張口吹氣呼吸未畢九天迅雷飛下火龍急捉玉虎雄鳴一聲旬旬某忽不見真人合掌曰善哉此妖除矣急命人尋

其下落但見西南隅破屋有一死鼠大如牛馬令及某子焚香叩謝並問所以除妖之故真人曰妖邪無不畏雷者此妖狡猾之至吾言必防故使吹杯傷其元氣然後出其不意發迅雷擊之使彼正氣不敵一擊而死衆皆拜服真人乃留三日而即進京去

說林卷二終

(丑告坐介)

(解三醒)(丑)蒙青眼通門之子愧才疎分又卑微(淨)家學自然是好的(丑)記趨庭略涉詩和禮慚薄翅不能飛(淨)此來有何見教(丑)向簾門展謁非違次(顧左右介)求前席從容霹虎威聽詳細(淨笑介)乃翁多軟美子不頑癡賢契可爲那揚州袁美人(丑)正是

(前腔)(丑)獻一朵瓊花嬌麗有沈魚落雁姿儀(淨)可曾見過(丑)巫山非夢親曾覩通情儘到深閨(淨)特去訪他(丑)是看花誤入桃源裏覩見那雲母屏風玉女扉(淨)怎樣個人兒(丑)難摹擬(淨)請略言一二(丑)盈盈秋水淡淡蛾眉那些揚州人都教他做袁家女秀才

(二學士)他是個紅粉樓中三學士萬言倚馬能揮况又是詩書鑄造多嬌面不比那錦繡包藏沒字碑稱得起翠繞珠圍金屋裏勸你把一座如君位設在帳房西

(淨掩丑口慌介)乍麼就說出如君二字萬一夫人聞之不是當緊的(丑)夫人怕沒有千里耳(淨)今日風順哩(丑低笑介)(淨)據賢契說來一定是個美人了只怕有了人家哩

(前腔)(丑)他雖是身價千金今已矣舊家門戶衰微只有個白頭孀母相依倚却又是揀盡寒枝不肯棲防備着綠葉成陰枝結子勸你把尋春馬莫教遲

(淨)明日就差人往揚州去還須賢契一行纔妙(丑)這却不消得老太師威行千里之外勅書上原許便宜行事那袁家母子欣然從命便罷稍有難徑仰地方官押送前來就是請下聖旨也沒人爭得去的(淨大喜介)有理有理只是賢契切不可走漏消息聖旨到還在次若那一道內旨下來我就當不起了(丑)曉得

(尾聲)(丑)暗中悄把紅絲繫(副淨)這月老筵虛准待誰(丑)我使袖手旁觀也燥脾

副淨 一任邊關賊急 只愁娘子軍罵

(丑)本借花枝獻佛 誰知密口藏刀

第十三齣 畫策

呂中 (柳稍青)(外蒼髯戎服引衆上)烽火西流邊關失守漸逼神州孤城如斗乾坤半壁借著誰籌

昨夜陰山吼賊風帳中驚起紫髯翁平明不待全師出連把金鞭打鐵驄下官种世衡洛陽人也起家縣令屢鎮邊州目下因元昊猖獗特擢陝西安撫駐札環慶俺思賊風甚銳邊備全無須要用間出奇方得尅期報捷咳如今草澤之內豈無英雄但恐搜羅不能遍及耳前日唐子方書來說他同鄉有個江雲仲文武全才只恐一時急切難到俺已經掛榜招募賢豪看有何人來着

(菊花新)(生衣帽佩劍上)從軍萬里仗純鈎刁斗連營塞草秋側席正旁求還看取英雄入彀

小生問關戎馬喜到環州恰遇种安撫出榜招賢不免經去投謁來此已是轅門了

(擊鼓介)(衆問介)(生)是來獻策的(傳介)(生進見揖介)荆州竄竊拜揖(外驚起介)呀原來就是江雲仲老夫失敬了(生拜)(外答介)(生)小生荆楚鄙人愧少先容何當青盼(外)唐子方其道足下有文武全才老夫正爾懸想忽接芝顏真有不勝之喜(生)辱采虛名遂叨前席小生常勉效尺寸以佐壯猷(外)江先生看你堂堂儀表決非碌碌庸仔幃幕之中正資商確聽我道來

(駐馬聽)(外)百二金甌鐵馬長驅事可憂則俺丹心似火孤軍撐天(自指介)雙鬢如秋你衣冠恥作仔流功名豈屑居人後速展奇謀看危如此全憑匡救

那元昊也不過是乳臭小兒有二將叫做天都野利着實利害野利已攻破延州今又探得天都王領鎮騎十萬來逼環慶此誠危急之秋先生策將發出(生)從來鬥力不如鬥智况彼衆我寡依小生愚見不若用間破之(外)用間甚好但不知怎樣個間法(生)小生途中聞知野利在延州屯駐今假寫一書密遣壯士徑往夏賊

營中只說是野利差與天都通謀的約他分據三秦倒戈歸宋那元昊看見此書自生猜忌既去天都則野利孤注可一戰而擒也(外起揖介)此計甚妙這封書便煩先生大筆(生)當得代勞(寫介)

(前腔)(生)李郭難儔鳥盡弓藏自古愁何不反戈僞國納款中朝與你割地鴻溝共分鐵券作王侯免教青史書賊寇片紙陰謀幸早爲之計望風翹首(外看喜介)得先生此書賢於十萬師矣(生)還要想一個遞書之人(外想介)此間有個僧人叫作王嵩其人堅樸可使(生)如此甚好小生暫且告退(外)就屈留先生在此便于請教中軍官可送江相公先到後堂備酒伺候(生下)(外)喚那王嵩進來(雜向內傳介)(副淨扮僧上)懶參土偶欺施主且向刀山救衆生老爺有何驅使(外)本院有蠟書一丸差你前往賊營(付書介)這書非比泛常也

(駐雲飛)不用戈矛橫掃千軍在筆頭(僧)說是那個差的(外)是野利將軍授(僧)持送與誰人(外)交付天都手你切不可徑送元昊先假裝翻帳入他營中謀

他一定要盤搜把來踪根究舌劍唇鋒借重蘇張口 你素習 柑梅解風
憂若得事濟回來呵

(尾聲)鐵門關一笑能鑽透便黃金布地怎相酬你可也魏一個空門大筋
斗(下)

(僧弔場)好個難題目哩咳士為知己死便去何妨(持書急下)

第十四齣 賄賂

(末扮老院子上)天有不測風雲人有暫時禍福常言女大難留嫁或招宜速小
娘忒弄聰明奶奶有些鶻突遺一座熱鬧揚州少甚麼富家官族又要檢擇才郎等
出這場變局自家哀鄉宦家老院子便是老爺去世夫人持家也極是嚴肅的只疼
養着一位小姐再不想尋個人家以為終身之計那小姐沒事幹每日爬起来吟詩
作賦不知怎麼把名頭揚開了如今有個四川防禦使要強娶小姐為妻你說這樣
事可是成得成不得的小姐日夜啼哭要死要活弄得夫人也沒主意下一封書

叫我求鮑兩臣相公設個法兒我想鮑相公雖然是個俠客那防禦使勢大得緊嘆
不知可能解圍哩既奉夫人之命須索去走一遭(虛下)

仙呂 (新水令)(小旦巾服上)眼中端的人無兩纔丟下又來心上此事和誰
講倚高樓把封侯夫婿幾回想

(減字木筆花)冠兒厮稱衫兒恰與腰支襯是也非那分別雌雄在那些 記會相
遇雲時又作東西去悔贈吳鈞教覓班生萬里侯奴家鮑雲姬自從旅店之中與江
生相會見他丰姿才學色色超羣遂慨然以心許之又將寶劍贈他叫他得了功名
就來訪我只是關河迢遞音耗茫然好生放他不下也(末持書上介)誰赴平原急
還來劇孟家(見介)院子叩頭(小旦)起來可是袁夫人家來的(末)正是夫人有
書在此(遞書介)(小旦拆看介)呀有這樣可恨的事你家夫人怎麼說

(玉肚交)(末)禍從天降他母子們徒然涕汪望先生略顯神通好替他救
出無雙(小旦)他本是紅樓嬌女白頭孀是何魑魅真無狀怪惡溫柔感傷

惹動咱平生俠腸

我也不寫回書了你去拜上夫人小姐叫他放心這事總在我身是(末)夫人還說鮑相公若解得此難我家小姐少不得嫁與相公的(小旦)笑介(事完了再作道理)(末)相逢無紙筆傳語報平安(下)(小旦)幸四長還斷雖然有些權勢他原是極怕老婆我想世間婦人一妬必貪再沒有妬而不貪之理不免多費金帛徑到江州把這消息遞與他婆子等他降下一道內旨不但解了袁家之網還要問上一個強占罪名兒是便是了叫個甚麼人去呢(想介)哦有了揚州媒婆裏內張七媽到是去得的(向內介)保母快請張七媽來(內應介)

(字字雙)(老旦扮張七媽上)奴奴綽號女蘇張善講姻緣花月領頭行撒謊紅絲繫處便成雙討賞朱門呼喚恁般忙急往

(見介)鮑相公見禮(小旦揖介)七媽來了請到書房裏坐(老旦)有何話說(小旦)這邊的袁小姐你曉得麼(老旦)可是那個女秀才(小旦)然也(老旦)嗚嗚再莫

懷家叔父

游子登臨處薊門烟樹開江東暮雲合不見尺書來遠道三千里離心一寸灰白頭人健否延頸越王臺

深宵

無語坐深宵天晴氣沈寥詩兼狂草寫燈帶碎花挑月色梁園雪風聲浙水潮玉璫何處寄空使別魂銷

閒步

兀坐兼旬戶半扃偶因閒步出虛庭六街滾滾黃塵外瞥見西山眼亦青早起

已讓鴉先起披衣夢乍驚檐牙移日影簾額轉風聲萬里懷人意三秋作客情不堪推枕處齊伴曉寒生

旅夜

廿五聲中夜滿長隔窗涼月上匡床不知歸夢到何處浙水東流俱故鄉

其山
故云

與鍾湘泉夜飲

絳帳同游處回頭已十霜今宵明月下共舉九霞觴夜氣侵詩骨寒威避醉鄉不無飛動意休笑次公狂

湯敦甫先生饋食物

曾共山翁飲深知禮數寬更分大官膳來佐腐儒餐味奪麟脯香生苜蓿

盤回思木蘭寺一飯寄偏難

代書寄周香舟四首

相別未云久相思今已深一年塵世夢萬里故人心燕市無同調嶺山有獨吟情懷俱鬱鬱何處問知音

夫子還山日狂花冑柳絲計當流火月應是到家時遠道無消息歸感別

離願言因驛使緘扎慰遐思

期君攀月桂珊瑚網又遺珠得失原天意妍媸自世途終當舒驥足未可息鵬

圖莫用瑤茅卜相看奮遠謨

旅食長安客堂堂歲月過書衣塵易浣筆鐙凍難呵時事關心極文章奈命

何壯懷誰與語風便寄勞歌

閨中感懷口占三首 丙申

風檐襖被夜無眠涼意侵人欲曙天草草十年成底事此間看月四回圓

銀箭無聲萬慮空一簾曉色五更風關心數百年間事多少名臣出此中

深宵愁寫字麻沙才短何由比八叉笑我名心猶未退此時先自卜燈花

雪樵詩存卷一終

男培基編輯 孫善慶校印

雲樵詩存卷二

昆明傅士珍獻廷

歸去來吟草古今體詩百二十六首

歸去來吟草者丙申途中所作及歸里後丁酉所得之詩也爾時信筆塗鴉未及繕稿丁酉秋復與計偕南北奔波棄之敝篋中不復置念己亥春館於郡伯雨亭夫子衙齋課餘取而雜錄之至今未及改定古人謂勞者善歌勞矣而歌不善毋亦聰明才力之所限有不能強者與夫以風雲月露之詞其難工也如是而况其進於此者心滋懼矣己亥十月七日雪樵識於求日益日損齋

出都別雲徵試館 丙申

黃梅雨裏唱陽關萬里人隨匹馬還世事由來如傳舍此生何處是家山燕辭故壘心猶戀鶴返深林夢自閒莫折春明門外柳恐招離恨未顏

衛輝旅次和壁間韻

年年旅食在他鄉憂患難消故態狂莫漫問天同屈子誰知有王郎冷
吟閒醉離情寄楚水黔山驛路長此去蘇門應不遠願分石壁愁腸
夜渡漿澤口

白雲無際接黃流夜色蒼茫冷似秋新雨纔添瓜蔓水微風輕送木蘭舟天
連曠野圍京邑浪擁羣山下汴州明月一輪星幾點乘槎應到海東頭

新鄭旅次用王眉仙題韻

聽到新蟬第幾聲大河南北問歸程此來豈是趨炎客相對長歌苦熱行浪
迹久忘離別感閒身真覺去留輕壯心時向愁中露待得聞雞夢又驚時值

同人
若之

新鄭早發用前韻二首

征鐸聲喧雜市聲奚奴相喚促登程人當曉色涼時起路向煙林健行連

滌易殘嫌夜短葛衣初試覺身輕雙輪安穩容濃睡啼鳥偏將好

勞歌唱徹不成聲又聽郵籤報去程感舊自憐人易老倦游愈覺路難行漢

波漲魚書隔洧水沙平馬足輕六度輪蹄徑此地回頭爭奈客心驚

山曉行

馬問前路羅衣侵嫩涼雲霞開夜色煙樹暗晨光蝶化繡安枕雞鳴又越

十年閒歲月強半付他鄉

至穎橋遇暴雨

雲挾雨過山村六幕冥濛晝色昏急點輕隨涼氣至寒聲如擁怒潮奔車

盡被新泥泥宛官路平看野水吞我亦蒼生同望澤天瓢遮莫手中翻

表隔道中憶東南舊游

越江直到浙東西千里湖山望眼迷蘇小墳邊曾載酒生公有言留題吟

空自縈風月爪跡憑誰記雪泥回首越王臺畔路傷離愁緒雨難

南陽漢世祖廟

閔運移炎祚真人濟世來赤符圖讖應白水帝基開天壽
才廟庭松檜響猶似走風雷

南陽懷古

隴蜀紛紛割據雄絳衣大幘倡英風聲威早自吞新莽
謹厚由來過沛公豈是金刀真應讖但收銅馬已成功
東都宮闕荒蕪久遙指春燭夕照中
臥龍岡懷古二首

炎祚將移勢莫支君臣魚水結深知兩篇疏奏春秋筆
六伐戎機仁者師學術得從明志日公忠盡到鞠躬時
先生早世譙周老天意憑誰一問之

孤負成都八百桑大星不復落南陽先聲早自驚
司馬忠愛何心效霍光三代人才生亂世一門節義媿
孱王李興特識王通繼庸史焉知

書前詩後

晉吳祚秋云諸葛亮躬耕於南陽之野縣去襄陽三十里
據此則武侯躬耕之地當以在襄陽者為是又躬耕之

名中